

東
華
續
錄

東華續錄

同治五十

臣王先謙敬編

臣張式恭恭校

八月甲午諭軍機大臣等萬青黎卞寶第奏查得馬賊來蹤暨賊首居址姓名請飭飛速掩捕一摺據稱此次馬賊係由八溝等處搶劫標車旋自喜峯口闖入關內見在寶坻縣知縣於城南大窪地方生擒馬賊一名供稱伊等夥眾一百七十八人內有爲首二人一名張三係錦州紅羅山人一名張玉係平泉縣臭水阡人又有忙牛營子十餘人都不知姓名請飭飛速掩捕等語該匪等糾集多人闖入關門若非地方官吏平日養癰成患何至盜匪結黨橫行目無法紀至於此極此時既將蹤迹訊有端倪亟應趕緊搜拏以除奸宄著恩合玉明寶珣德椿慶春麒慶均各密派兵勇分

往供出住址將張三張玉等犯嚴密掩拏務獲並忙牛營子從賊逆犯及其餘夥黨嚴究姓名按名弋捕不准一名漏網更不准機事不密致令賊首聞風遠颺賊蹤飄忽無常難保不在關外地方滋擾並著恩合麒慶等嚴飭所屬隨時偵探捕拏儻該將軍等泄沓成風縱盜養奸致地方實授其害定必執法嚴懲不貸萬青藜等摺均著鈔給閱看將此由四百里各諭令知之○諭本日據文謙奏探聞馬賊出口及添派兵丁守護隆福寺 暫安殿情形崇厚奏派兵赴薊會緝賊匪萬青藜等查明賊蹤請通飭嚴緝各摺片隆福寺 暫安殿處所經奕劻等並文謙先後添派旗綠各營兵丁見在統計共有三百數十名本日諭令奕劻載岱文謙並察杭阿等於文祥到時將防護事宜會商妥籌辦理文祥此時計已馳抵隆福寺所有應辦事宜自可與奕劻等詳慎妥商其所帶之

神機營兵四百餘名卽著畱於隆福寺附近地方擇要駐守見據文謙奏稱賊由遵化州煙園店至遷安縣之刀馬淺向邊界東路逃竄詢據路過行人所稱或由刀馬淺或由喜峰口或由鐵門關逃逸均尙未見的确萬青藜等奏稱據寶坻縣獲賊詢供則稱賊由八溝喇嘛廟五十家子等處竄入喜峯口文祥見抵隆福寺於賊匪蹤迹及竄擾情形就近探訪自必知之更悉賊匪如已出口見在屯踞何處應如何追捕並知照熱河都統就邊外附近地方一體截擊會捕之處諒已妥籌辦理榮祿所帶之神機營官兵卽著文祥飭令探明賊蹤酌派馬隊追擊或應在何處扼要防紮之處亦著相度辦理崇厚聲稱見派馬步隊三百餘名赴薊州東路會同地方文武捕擊並派守備姚懷德改裝易服密訪匪蹤等語所籌尙妥其所派之兵三百名並著文祥畱於薊遵一帶訪緝應

在何處擇要駐守隨時斟酌情形辦理文謙摺片並崇厚萬青藜等摺均著鈔給閱看將此諭令知之○乙未諭軍機大臣等文祥奏馳抵邦均探悉賊蹤竄逸撥兵接捕各情形一摺長善奏派兵守隘並查訪馬賊來路行蹤可否督兵駐紮羅文峪各摺片據文祥奏稱賊由喜峯口進關沿遵王等州縣竄入寶坻繞至邦均之陳家莊滋擾經文謙派兵與該處團勇會擊追至別山及燕山口槍殺八名賊由遵化之煙園店竄至遷安之灤陽一帶勢欲出口見在薊州暨馬蘭鎮一帶均無賊蹤等語與文謙萬青藜等昨日所奏情形大略相同賊匪是否已經出口尙難豫定文祥見帶馬步各隊趕赴隆福寺並分派榮祿英夏管帶馬隊繞由玉田燕山口向遵化迤東一帶探蹤剿捕著卽飭令榮祿等會同崇厚文謙所派官兵實力搜緝長善所奏熱河地面八溝一帶尙有馬賊六

七百人等語文祥俟抵隆福寺後一面將防護事宜妥慎布置一面即將長善所奏賊情詳細探明近邊一帶各口防兵務須均勻分布徒聚一處則勢難兼顧榮祿等所帶各馬隊礙難遠剿如賊匪業已出口相距較遠卽著將此項馬隊並崇厚所派官兵分布近邊一帶周密巡查如口內各要隘有崇厚等所派官兵足資接替卽可將榮祿等所帶馬隊撤回其應畱應撤均著文祥相機酌辦長善所奏密派官兵在山海關隘口防守巡緝情形所籌尙安卽著照所擬認真辦理不得有名無實該副都統擬請於巡閱羅文峪時親督官兵駐紮防守卽著屆時赴羅文峪一帶擇要駐紮以期周密至山海關地方亦甚緊要著揀派得力協領等員認真巡守毋稍大意長善摺一件片二件均著鈔給文祥閱看至馬賊執持火器由熱河邊外闖入喜峯等口有三百餘人之多八溝一

帶尙有馬賊六七百人不等麒慶身任熱河都統何以毫無聞見並不派兵剿捕殊堪詫異著卽懍遵昨日諭旨迅撥重兵將此股巨匪趕緊撲滅毋得稍畱餘孽並將口內馬賊力行截擊不得縱令出關與八溝股匪合併該都統旣已疏防於前若再不力將此股匪徒撲滅任令他竄豈能辭咎長善片一件著鈔給閱看昨據萬青黎等奏賊首張玉係平泉州臭水阡人本日文祥奏馬賊頭目係楊五巴等是否卽係平泉州臭水阡一股並著麒慶查明具奏將此由四百里各諭令知之○諭官文等籌解成祿軍餉○劉蓉緣事降調以趙長齡爲陝西巡撫楊重雅爲四川按察使由候補道○丙申諭軍機大臣等長善奏大股馬賊竄出鐵門關官兵追擊接仗情形一摺據稱賊眾從灤陽竄至三岔口由東北奔出鐵門關外迎頭鈔擊至桃樹嶺地方該匪傷亡十數人見已遠竄又

聞口外哈達地方賊目丁起瀧張洪禮邀集馬賊數百人在於八溝各處結黨成羣並有欲來報復之語著麒慶懷遵疊次諭旨迅撥重兵認真撲滅以期淨絕根株賊目丁起瀧張洪禮在於八溝地方結黨嘯聚若不趕緊剿除必致釀成巨患並著該都統卽行查明迅速籌辦若令遠颺貽害他處必治該都統以應得之罪懷之劉長佑身任封圻責無旁貸著卽遴選能帶馬隊之戰將數員挑派得力馬步隊數百名馳往八溝地方會同熱河兵弁痛加剿洗毋稍懈忽馬賊雖竄出鐵門關難保不去而復來長善務當督率弁兵嚴防關隘並於附近一帶地方多設偵探遇賊卽擊所有邊牆倒塌地方各小口著劉長佑麒慶長善派員查勘設法堵禦爲一勞永逸之計本日又有人奏賊擾遵化署知州恭鈞並不帶役堵禦轉給與酒食大張筵席任其飽颺而去等語如果屬實實

屬不成事體著劉長佑查明據實參奏片一件著鈔給劉長佑閱
看將此由四百里各諭令知之○諭玉明等奏協領接仗失利見
籌援應情形一摺開原屬之九社孫家臺等處疊有賊匪三百餘
人竄擾焚掠昌圖廳屬又有盜匪二百前往焚劫該匪復從吉林
東山句來盜匪烏慈李匪黨五百餘名占踞偏梁屯等處其開原
城西古城子明安碑等處復有另股賊匪一百四五十名協領恩
科等由明安碑渡河往擊未及渡齊爲賊所乘陷於水淖器械多
失該協領統兵七百餘名遇百數十名之賊遽至敗衄雖屬不諳
地利其懦弱無能亦可概見恩科著暫行革職戴罪剿賊以觀後
效目前昌圖開原等處一片賊氛恩合計可抵任卽著確探賊情
應否親帶勁旅出省督剿並著酌量辦理恩科見已失利飭令整
頓隊伍會同協領古尼音布等馳往昌圖偏梁屯等處力殲羣醜

並移會吉林將軍派兵兩面夾擊務將烏志李等犯首擒斬以絕根株明安碑等處股匪著飭令協領德印會同開原尉縣追擊毋任紛竄添調之錦州義州馬隊卽揀得力之員統帶以爲後應孫家臺等處賊匪見竄何處並著恩合等設法兜剿恩合經朝廷特簡於地方軍務必須實力整頓破除情面將弁中如有畏葸遷延卽行嚴參懲辦省中操兵緝匪諸事該將軍尤須會同寶珣等認真辦理匪犯徐五回踞大孤山見在情形若何如須水師助剿卽遵前旨奏調恩合未到任以前玉明責無旁貸不得存五日京兆之見自干咎戾奉省爲根本重地總由地方官平日養癰貽患以致賊匪橫行寶珣德椿儻再不知振作精神力圖補救厥咎甚重朝廷豈能曲貸也將此由五百里各諭令知之○諭劉蓉奏擊退甘回進攻吳旂鎮剿辦甘省逃勇探明捻逆竄擾情形分防潼商

等處並張家川竄回猖獗各摺片甘省逆回由合水竄入鄜州所屬之王家角經鄆太愚楊得勝整軍進剿該逆聞風遁回而吳旂鎮大股逆匪尙盤踞未動該處偏近陝邊定靖廊保一帶均虞竄越劉蓉見飭令楊得勝駐兵河上原以防賊回竄鄆太愚率所部四營進攻吳旂鎮踞逆惟兵力較單必須甘省分兵會合始能收夾擊之效劉蓉請派魏添應一軍會同截剿惟該軍前在金積堡敗挫後能否再振著楊岳斌督同楊能格斟酌情形就近調撥一軍會同鄆太愚等將吳旂鎮踞逆實力剿洗毋畱餘孽靈州金積堡之匪擾及紅柳溝半圈山等處劉蓉見派陶茂林帶兵千名馳防柳樹澗著楊岳斌飭令翁同書將甯條梁所駐防兵移紮柳樹澗以資厚集劉正高所部潰勇由汧隴竄至鄆縣經邱時成彭體道等督隊剿殺殲斃數百名餘眾七百名棄械悔罪剿辦尙屬認

眞所有擒獲之首犯王得順等卽著劉蓉訊明正法以昭炯戒劉
蓉以該潰勇等擅敢相率逃逸復於沿途搶擄若准其回籍恐甘
省各軍效尤更無固志見仍勒令文元興等帶此項投誠潰卒回
甘歸伍所見固是但此等潰勇畱於軍營徒糜餉需恐難得力著
楊岳斌酌量驅策分別去畱毋令再萌故態張家川逆回前已爲
雷正綰剿除此時復有逆回數千竄踞著楊岳斌派兵馳剿劉蓉
卽飭蕭德揚劉玉興等軍迅於汧隴擇要堵禦毋任闖入河南張
總愚等股竄入宛境蔓延南陽鎮平鄧州等處內鄉淅川一帶俱
有邊馬肆擾是陝省商南防務尤形喫重劉蓉已派劉厚基督率
五營駐防武關一帶黃加焜招募兩營扼堵漫川關著卽嚴飭各
員會同該處地方團練嚴密布置毋稍疏虞其潼關防務並著迅
催黃鼎之軍趕緊馳赴金斗關妥爲備禦秦豫壤地毗連逆蹤時

虞西竄豫省各軍業經屢諭吳昌壽迎頭堵擊毋令竄陝矣昨因劉蓉於前次回奏蔡壽祺所參摺件語乖敬慎已照部議將該撫降一級調用並簡放趙長齡爲陝西巡撫趙長齡到任尙需時日陝省東西兩路邊防喫緊劉蓉在任一日卽係責無旁貸儻敢存五日京兆之見致誤疆事必將劉蓉再行治罪懷之將此由六百里諭知楊岳斌劉蓉並傳諭楊能格知之○漕運總督吳棠奏據藩司稟稱曾國藩批飭清淮防務已鬆防兵大可裁減查清淮爲南北通衢本年秋收已歉冬後更虞宵小竊發擬將得力之兵勇酌畱六七千名其餘各隊漸次遣撤得旨著照所請卽咨商曾國藩妥籌辦理毋致顧此失彼又奏湖河續漲趕啟高郵各壩宣洩仍飭道廳竭力搶護批仍著督飭該管道廳分投加鑲極力搶護所需經費著與李鴻章籌商撙節提用覈實報銷○以疏防馬賊

萬青藜等鐫級有差○賞已革內閣學士恩承五品頂帶交神機營差委○予陝西被戕副將顏明亮祭葬世職○丁酉 慈安皇太后 慈禧皇太后懿旨命太常寺卿奕慶在弘德殿教習清文○諭軍機大臣等文祥奏督同馬步各隊馳抵隆福寺大概情形一摺此次馬賊由邊口竄入該管官業已疏防於前迨該匪回竄並不撥兵嚴密堵禦任令竄出鐵門關搶去礮位擡槍營務廢弛已極著文祥迅卽查明據實參奏該匪行蹤詭秘雖經官兵追躡並未大受懲創難保不去而復來隆福寺 暫安殿防護最關緊要本日已諭令福興馳往統帶神機營守衛馬步官兵所有應行籌辦各事宜著文祥迅速妥爲布置俟福興到防後將防務交該都統接管卽行回京覆命並著將崇厚派出之馬步隊三百餘員名調赴遵化州擇要駐紮其榮祿等所帶馬隊已派赴遵化一帶

確探賊蹤俟各要口情形查探明確後文祥如察看見在兵力足敷分布卽著飭令榮祿等帶隊回京至所稱薊東一帶酌畱兵隊沿邊各口添兵守禦使該匪不敢再來窺伺所籌甚合機宜本日據麒慶奏查明馬賊入口情形見派佐領穆濟楞帶兵赴喜峯口扼截已嚴飭該都統督率各營認真堵剿並令劉長佑添派官兵將邊牆一帶各隘口嚴密設防矣麒慶摺著鈔給閱看將此由四百里諭令知之○諭麒慶奏查明馬賊入口見辦情形一摺該都統平時於所轄地方漫無覺察任賊縱橫迨至接奉寄諭始鋪敘兵勇追剿賊蹤飄忽等詞入奏以圖掩飾昏愎顛預實屬可惡見在此股馬賊竄出鐵門關搶去擡槍礮位在分水嶺地方屯踞並聞口外哈達地方有賊目丁起隴等馬賊數百成羣結黨是否卽係該都統摺內所稱自清河溝等處竄來之匪著卽懷遵疊次諭

旨飭令佐領穆濟楞等帶領馬隊官兵將喜峯口邊門一帶嚴密
截剿並一面督飭八溝等營將丁起隴等賊盡力殲除儻形同聲
賁致馬賊再行入口必將麒慶從重治罪劉長佑身任封圻徐廷
楷統轄綠營於賊匪竄入內地地方文武漫無準備已屬不成事
體又復任令遠颺搶掠關門槍礮來去自如肆無顧忌不識該督
等所司何事著迅遵前旨添派官兵將邊牆一帶各關口如遵化
之鮎魚池冷水嶺山查峪沙寶峪馬頭峪羅文峪遷安之喜峯口
鐵門關等處以及不甚著名歧出邊口擇要堵扼嚴加備豫儻謂
賊蹤已去仍無布置致賊復行入口或另股續行竄入恐該督等
不能當此重咎也懍之將此由四百里諭知劉長佑麒慶並傳諭
徐廷楷知之○諭王榕吉奏臬司到任商辦防務陳湜奏馳抵晉
省與撫臣商辦防堵事宜請於楚軍內擇尤爲得力之員著派數

員來晉各等語前據劉長佑奏記名提督黃仁遺等二百餘員名由湖南赴直隸軍營投效當以甘省需員帶兵已諭令劉長佑擇其尤爲得力者酌留數員其餘令赴楊岳斌軍營聽候調遣茲覽王榕吉等所奏請調陳湜舊部楚將到晉教練自係因共事熟習易收指臂之效著劉長佑將前次到直之黃仁遺等二百餘員名開單知照王榕吉陳湜其中如有陳湜舊部得力之員准其調赴晉防此項人員內如無該臬司舊部卽不必勉強遷就調往致滋冗濫此外或有尙在本籍及他處軍營之員亦惟陳湜與該護撫籌商酌調以資得力所陳擬將楚軍教練之法酌採條目咨行各鎮協分飭所屬弁兵於常操外按照新章認真操演尙屬簡便易行惟須認真辦理方可漸次收效陳湜將臬司公事稍爲料理卽著馳赴澤潞蒲州等處察看地勢兵情如有應行更張之處隨時

與王榕吉籌商妥辦以副委任將此諭知劉長佑並傳諭王榕吉
陳湜知之○諭張之萬奏祥河廳祥符汛大河溜勢由十四堡對
岸灣折北趨直射十五堡奔騰浩瀚勢甚湍激致順隄七八兩埽
斗蟄入水其八埽後起至十六埽後止大隄裂縫七十餘丈見在
竭力搶鑲工程萬分喫緊需費浩繁請飭迅行籌撥等語祥河廳
險工疊出並上南等處待款孔殷亟應寬籌經費以濟要需著吳
昌壽轉飭藩司迅將前項准撥之款照數籌解毋再延玩並由張
之萬迎提到工酌覈動用仍督飭該道廳等將應鑲隄埽各工實
力搶辦俾一律均臻穩固不准稍有疏虞昨據劉蓉奏捻首牛落
紅等由內鄉西竄浙川廳之板橋川商南防務視潼關尤形喫緊
劉蓉已飭劉厚基率所部赴武關一帶扼紮並檄黃加焜等軍扼
守漫川關金斗關等處已諭令劉蓉嚴密防範惟兵力較形單薄

並著吳昌壽督飭豫省各軍實力遏截夾擊毋令擾及鄰境完善
地方近日軍情著隨時確探馳奏將此由四百里各諭令知之○
廣湖北漢川縣學額七名江西永甯四名廣東潮陽一名○戊戌
諭內閣前據伊犁參贊大臣聯捷奏陝西布政使林壽圖蒞任兩
年諸務廢弛終日燕處衙齋沈湎於酒巡撫劉蓉諸事聽信以致
參劾不公物議沸騰並據御史陳廷經奏劉蓉於蔡壽祺一案回
奏摺內大言不慚有乖臣禮且摺內申明從前胡林翼密保之詞
忘其洩漏軍機之罪請旨嚴行懲辦當經特派瑞常羅惇衍馳赴
陝西嚴密訊辦茲據奏稱或事屬子虛或實有其事請交部議處
等語此案既據瑞常羅惇衍查明林壽圖於陝西善後各事宜均
經隨時札飭各屬籌辦亦無沈湎於酒實據其參劾各員或由劉
蓉特參或由藩臬會詳非盡出林壽圖一人意見已革通判松齡

等以被參屈抑等詞稟訴經瑞常等逐層研詰並札飭林壽圖據實聲覆均非無故參劾其李紹曾所稟輪署到班不委各情亦係懷疑妄稟全屬子虛均著毋庸置議惟林壽圖因福建會館會祭天后演戲宴請同鄉各官於部選松齡到任日期不遵部限署知縣謝輔纓張皇賊勢多報勇數僅予撤任停委均未允協林壽圖著交部議處劉蓉於瑞常等傳旨面詢卽自知前奏措詞失當俯首引咎所稱胡林翼密保之詞雖據呈出胡林翼原信係由該前撫鈔給閱看究屬不合除胡林翼業經病故毋庸議外劉蓉著交部議處署涪化縣知縣謝輔纓於回匪竄擾縣境雖防守尙稱嚴密而張皇虛報亦屬咎有應得著交部議處尋議上得旨前任陝西巡撫劉蓉著照部議降一級畱任該撫另案降調因任內有革職畱任之案照例革任此次應得處分著該部照例注冊林壽圖

著降三級調用毋庸查級紀議抵謝輔纓著卽行革職○諭軍機大臣等文祥奏酌擬布置防緝情形並京兵駐紮遵化及拾獲賊匪結盟小摺鈔錄進呈各摺片遵化遷安爲沿邊口隘要衝文祥見令天津兵勇暫紮遷安令榮祿等各處搜查事竣酌畱馬隊駐紮遵化並以口外地方遼闊京兵情形不熟飭令榮祿等實力巡防毋得貪功輕進與初三日寄諭昭合卽著照所擬辦理至此次賊匪聞風遠竄並未大受懲創竄出鐵門關後在分水嶺地方搶刦標車若不設法搜剿盡絕根株其患何所底止文祥另籌殲除辦法及防護事宜卽著妥籌具奏至拾獲賊匪結盟小摺所載匪徒姓名住址是否隨意捏造抑係有心仇扳本日已寄諭劉長佑崇厚麒麟慶長善閻敬銘派員嚴密訪查如果屬實卽行拏獲究辦將此諭令知之○已亥諭軍機大臣等吳昌壽奏賊蹤分竄東股

擾及阜陽西股仍在唐縣官軍剿辦情形一摺另片奏陳國瑞患病請假兩月等語東股賴陳等逆經參將王文行等追剿截殺賊由沈項一帶擾及阜陽西股捻匪本由唐邵竄擾鎮平折竄鄧鎮交界之黑龍集地方意圖久踞經張曜等整旅追擊斃賊甚夥匪眾棄壘東走張曜率隊追擊屢挫賊鋒該匪遂向東南竄去已至唐縣之井樓水虎劉等處卽著吳昌壽嚴飭張曜等力圖進剿將唐縣境內踞匪悉數殲除其東竄阜陽之賊並著吳昌壽督飭王文行等實力追擊相機剿除惟豫省兵力止有此數東西分剿實有應接不暇之勢官文等前奏調姜玉順一軍直赴新野會合豫軍剿賊何以至今尙未入豫喬松年前奏遵派康錦文一軍前赴許州何以迄無抵豫消息實屬玩泄均著傳旨申飭見在竄擾阜陽賊匪逼近潁州喬松年當飭令英翰等實力迎擊曾國藩迅飭

劉銘傳周口一軍會合兜擊盡殄賊氛成大吉等軍並著官文鄭
敦謹飭令由孝感一帶節節進兵以剿爲防不得自顧疆界再涉
延玩其西股竄至唐縣者與隨棗相去甚近官文鄭敦謹當飭劉
維楨等軍認真堵剿不得再事因循貽誤疆事豫省剿賊利在馳
騁需用馬隊甚殷著曾國藩懷遵前旨將馬隊迅速整頓續行添
撥赴豫交吳昌壽調遣以厚兵力陳國瑞見在患病著賞假兩箇
月准其前赴清江就醫回籍省墓假滿卽令速赴豫省聽候差遣
將此由六百里各諭令知之○諭據瑞麟等奏官軍擊敗花旗股
匪並擬見復鎮平情形一摺花旗股匪被江南截擊回竄龍川等
處託爲就撫以款我師經瑞麟等飭令卓興等移營進剿斃賊多
名見仍令該將弁跟蹤追剿所辦尙合機宜惟漣逆在鎮平與靈
營叛卒互相援應並有由嘉應出竄之意設與花旗合股同竄南

雄信豐勢必再擾江楚瑞麟等雖調派副將朱國雄等移紮連和並添募楚勇馳赴南雄扼守而進偪鎮平之軍止有方耀康國器兩軍尙形單薄未可以操必勝之權閩粵接壤之區雖嶺路崎嶇而高連陞等何以日久未到著左宗棠等嚴飭各軍迅速馳赴粵省會同進剿以期速復鎮平前諭孫長紱飭令席寶田等軍越境會剿劉坤一並有會商粵閩督撫派兵合剿之奏計程當抵新任並著迅速催令贛州防軍入粵以厚兵力毋稍遲誤惟花旗剿敗之餘易於殄滅若將此股速籌剿除則不至專待客軍方能蕆事著瑞麟等嚴飭卓興等奮勉攻剿不得稍涉鬆懈致任竄逸僞天將譚富自拔來歸殊可嘉尙著准其更名隨營效力儻能殺賊立功並著瑞麟等奏請獎敘將此由六百里諭知瑞麟左宗棠徐宗幹劉坤一郭嵩燾並傳諭孫長紱知之○賞八旗兵丁一月錢糧

○庚子諭內閣前御史丁壽昌等先後奏參護理陝甘總督心麟等偏聽議撫縱賊擾民並都察院奏甘肅增生胡第甲等呈控大吏徂和殃民各情均經諭交楊岳斌秉公查辦茲據楊岳斌逐條確查分別酌擬具奏此案撤任甘肅布政使前護理陝甘總督恩麟於陝回變亂之初既未能嚴扼邊防迨賊蹤竄入甘境狄河回匪相繼滋事復輕聽革員成瑞和祥徂於議撫致甯夏固原等城疊被淪陷生民慘遭荼毒嗣又奏報不實濫保多人且平時於升調補署各缺動輒瞻徇吏治日就廢弛實屬欺蔽昏庸孤恩溺職深堪痛恨恩麟業經撤任著卽行革職已革提督成瑞開復道員和祥經恩麟委辦回務偏於主撫迨回眾屢叛輒以漢民挑釁爲詞飭令各城鄉散團繳械致回逆橫肆殘殺村舍爲墟復敢危言恐嚇稟報欺蒙貽誤事機實難辭咎和祥業經病故著仍行追奪

官職成瑞著仍發往黑龍江充當苦差不准各統兵大員奏留隨營並由楊岳斌卽行起解已革捐職幕友彭沛霖經前署督沈兆霖奏參發往黑龍江充當苦差歷時四年疊經有旨嚴催起解仍敢逗畱甘肅省城往來督署並夤緣入成祿軍營希圖免罪實屬怙惡不悛目無法紀彭沛霖著不准畱於成祿軍營卽行起解赴黑龍江充當苦差永遠不准釋回該革員家產並著查封入官變價充餉毋庸給還勒休參將松林已革護參將李友伏守備劉建勳已革署綏甯鎮總兵楊永魁以剿賊武弁相率迎合縱寇殃民弛備喪師實堪痛恨除松林業已勒休李友伏楊永魁業經分別革職遣戍均無庸議外劉建勳著卽行革職以示懲儆○諭軍機大臣等劉長佑奏馬賊任意出沒跟蹤會剿並遵旨飭查萬祿等被參各情設法堵禦邊口各摺片馬賊由鐵門關竄出八溝一帶

尙有馬賊數百人聚散無定劉長佑見在添調提標馬步兵二百名交參將趙喜義管帶並由徐廷楷加派勇敢將弁前赴八溝一帶會剿卽著嚴檄該員等會同熱河派出官兵協力進剿悉數殲除毋得再涉疏虞致令馬賊得再奔竄入口劉長佑俟李鶴年回省擬卽著帶南路馬步隊數百名先行馳赴永東遵薊一帶查勘邊隘卽照該督所擬於出省後妥籌堵剿一俟布置周密再行折回查勘橋道毋稍大意遵化遷安等處邊牆關口紛歧劉長佑務當嚴檄派出弁兵認真防守晝夜巡邏力扼該匪竄越之路毋得有名無實任令賊蹤來往自如致干咎戾萬祿章燦蒸鈞等所報剿賊被圍登時擊退各情與原參情節迥不相符著劉長佑秉公查明如所參屬實卽行從嚴懲辦毋稍寬縱賊由鐵門關逃逸其時何弁駐守並附近鐵門關等口不能堵禦之員弁均著查明從

嚴參辦將此諭令知之○諭楊岳斌奏哈密賊眾意圖東襲嘉峪關聯捷奏勦辦安定會甯股匪進軍救援北路繪圖呈覽各摺片奇台陷後文麟退紮巴里坤徐圖進剿哈密已據文麟前次奏報該逆兇燄日熾其欲攻取坤城東襲安西敦煌玉門直趨嘉峪關自在意計之中文麟兵力單薄若關內無兵接應誠恐一意東竄匪勢日張且嘉峪關前次曾被關外獵戶襲踞又甘肅一帶一片同氛若內外句結爲患何可勝言成祿聯捷鶴齡本係出關之軍見在楊岳斌以甯靈股匪分竄涼州商令成祿鶴齡由涼州進發卽著該提督迅速整軍掃蕩而前剋日西剿並著楊岳斌飭令黎獻之兵將肅州城垣迅行攻拔肅甘一帶無警成祿及鶴齡各軍卽可取道出關相機勦辦毋得再事遷延聯捷見因曹克忠失利後經楊岳斌商令進援北路該大臣已進紮肅河城收復石山灘

等處回村上下回民百餘里均已就撫著卽迅由鹽茶廳等處探明賊蹤力圖剿洗惟回逆狡詐多端甘省諸軍屢因議撫僨事可爲前鑒聯捷萬不可稍涉大意致墮狡謀出關兵力不厚又有肅甘回匪牽掣而甯靈自雷正綰曹克忠敗後匪勢又復蔓延楊岳斌身任封圻自當統籌全局應如何添兵北路騰出聯捷一軍會合成祿西行之處著該督妥籌調度聯捷另片奏途次接據回民呈詞請飭妥爲安插等語已明降諭旨交楊岳斌飭令地方官妥籌安插矣朝廷於回民初無歧視如果安分良回地方官何得一概驅除致令相率從賊但逆回詭譎百出動以乞撫施其詭計亦不可不嚴爲之防惟在地方官辦理得宜庶可望其觀感而不墮其狡謀嗣後著楊岳斌細心查覈如實係真心向化者方可寬其既往予以自新萬不可再蹈從前覆轍其私通逆回之彭慶章著

該督嚴飭查拏卽行正法毋任漏網將此由五百里諭令知之○
嚴定京控交審案件逾限處分○予山東陣亡國子監典籍武文
培等祭葬世職建祠○大學士祁寯藻因病請解職得旨准其開
弘德殿差使以大學士致仕仍加恩支食全俸○辛丑諭軍機大
臣等昨據文祥奏籌剿馬賊並關內外地方情形各摺片本日復
據長善奏遵籌固守關隘並派兵巡防一摺所奏尙係實在情形
卽著長善嚴飭所屬各口防守尉等認真稽查遇有賊警飛速馳
報添兵捕剿儻有仍前玩忽各情並著長善從嚴參辦該副都統
所派出之兵一百名應如何駐紮之處著文祥籌酌辦理文祥俟
福興到後布置妥協卽行交代回京長善摺著鈔給文祥閱看將
此各諭令知之○諭楊能格奏慶陽各營分布要隘截賊東竄一
摺逆回由吳慶鎮下竄鄜州王家角等處經張得勝等軍截拏該

逆由鐵邊城竄回其靈州大水阮定邊紅柳溝之賊時在元城鎮
東西兩川民村搶糧楊能格見派魏添應馳赴元城鎮察看地勢
會合陝軍夾擊惟因雷正綰進攻李旺堡飭調韋州紅德城各營
前往助剿紅德城一帶賊眾路歧僅止智字兩營駐防甚形單薄
著楊岳斌將雷正綰所部各軍應畱應調酌量添撥毋令顧此失
彼甯夏久攻未下都興阿穆圖善務當督率各軍力圖攻拔仍一
面將定邊花馬池一帶竄匪分軍掃蕩肅清後路何得曠日持久
頓兵堅城劉蓉前派楊得勝駐兵河上原防賊回竄並令鄂太愚
率所部進攻吳旂鎮著卽飭令會合慶防各軍實力攻剿截賊東
竄之路楊能格亦當督飭各軍嚴扼要隘不得任令賊蹤紛竄是
爲至要將此由五百里諭知都興阿穆圖善楊岳斌劉蓉並傳諭
楊能格知之○以李宗義爲江甯布政使

山兩淮鹽運使遷

○癸卯諭軍

機大臣等據訥爾濟奏擊退賊匪出方員弁開單請獎及飭催大兵出關並齎信回王伯錫爾令其安撫回眾及請將緊要文報由烏里雅蘇台專遞各摺片又據何瑄奏巴里坤接仗獲勝及餉絀情形各摺片巴里坤援兵未至該領隊大臣能督飭見有兵力以少勝多辦理尙屬得手見雖回匪已退難保不勾結復來成祿一軍著卽懷遵前旨迅由涼州取道進發並著楊岳斌妥籌調度騰出聯捷之軍催令該參贊迅速前進其鶴齡之軍並著迅催出關俾巴里坤待援之情有所指望不得再事遷延致干重咎回子郡王伯錫爾本有幫辦之責訥爾濟見在致書令其安撫哈密回眾若能措置得宜自當優加賞賚著訥爾濟於探明該郡王住址後並將此旨傳諭使之有所觀感鎮迪道文麟於奎蘇戰敗後退至三塘湖居住其恇怯已可概見並著訥爾濟查明詳細情形據實

具奏巴里坤臺站被擾文報不通訥爾濟已改設北路臺站所籌甚妥卽著將六月十九日所發摺報補行具奏該處與烏里雅蘇台接壤著明誼等籌商設法安置蒙古軍臺改道行走以資接遞何瑄所奏餉缺情形實堪慮念著訥爾濟籌商接濟並著明誼等於解到軍餉設法撥解毋稍遲誤將此由六百里諭知明誼麟興車林敦多布楊岳斌成祿聯捷訥爾濟並傳諭何瑄知之○以吳坤修爲安徽按察使候補按察使○廣江西萬安縣學額六名湖北漢

陽一名○甲辰諭軍機大臣等崇實等奏裏塘夷案辦理完竣所轄臺站均已安設並飭藏兵暫緩折回各摺片裏塘夷案經崇實等督飭史致康辦理完竣當招回各土司所管百姓復業一面飭令正土司與堪布格桑喇嘛等公舉頭人另充副土司暨崇喜土司可以絕葛藤並將句結瞻酋藉快私忿之副土司拉旺策勵土把

總銜任曾工布一併斥革發往前藏充當苦差均著照所擬辦理
在逃之崇喜土司拉旺任曾著崇實等飭屬嚴拏務獲究辦母任
漏網其應辦善後事宜卽著飭令史致康妥爲辦理以便景紋起
程前進迅赴新任前因藏兵騷擾諭令崇實等卽行撤回茲據奏
稱藏兵與各土司見已逼近瞻酋老巢若卽行撤退瞻酋恐又鴟
張請飭暫緩折回等語此項藏兵如由該將軍等飭令會同眾土
司剿滅瞻對則藏兵藉口向內地索餉自係意中之事誠不可不
豫爲之防著照崇實駱秉章所擬暫緩札飭折回姑聽其與各土
司自行攻剿瞻酋俾免另生枝節裏塘善後一經辦理藏事卽著
檄令史致康馳赴瞻對境內體察情形妥爲駕馭毋令別滋事端
駱秉章目疾未愈本日已明降諭旨毋庸開缺賞假四箇月安心
調理四川總督著崇實暫行兼署遇有緊要公事仍著崇實與駱

乘章隨時商酌妥協辦理將此由五百里各諭令知之○駱秉章

因病請假以崇實暫署四川總督

由成都將軍署

○乙巳諭內閣前因署

直隸提督徐廷楷疏防馬賊竄入關口當降旨將該署提督交部議處茲據文祥奏稱該署提督經文祥咨令派兵兜剿賊匪並查詢所屬邊牆各口情形迄今既未撥派官兵又未將所屬邊牆繪圖咨送實屬玩視軍情不以緝捕爲重徐廷楷著再行交部議處以示懲儆如再玩泄從事定行從重治罪○諭軍機大臣等文祥奏遵籌分別撤留兵丁及查明馬賊出口情形請將徐廷楷交部議處各摺片已明降諭旨將該署提督再行交部議處矣所陳布置邊門各口及內地各要隘均屬周妥已照所擬寄諭福興劉長佑麟慶長善連成萬青黎卞寶第崇厚恩合阜保並傳諭徐廷楷一體照辦其健銳等營馬步五百餘名卽由文祥帶領回京以備

將來隨扈及預備京城應用文祥一俟福興馳抵該處卽著交替
回京並將一切布置機宜妥爲告知福興以期周備將此諭令知
之○諭直隸沿邊北面自遷安至遵化大小關口五十六處僅喜
峰口駐有旗兵二百名羅文峪冷口旗兵數十名此外綠營所轄
僅有官兵百數十名分布數十處關隘何能濟事見在 定陵奉
安伊邇自應於遵遷一帶擇要畱兵防守以扼其衝遷安屬之灤
陽三岔口爲進關要隘灤河橋爲薊遵遷三屬門戶尤應分兵駐
守以固藩籬文祥所籌扼要分防之法布置甚爲周妥卽著照所
擬除火器營威遠隊馬步四百餘員名於隆福寺紮營駐守外其
長善所派槍兵一百餘名卽紮喜峰口與該處駐防旗兵二百餘
名會同巡守直隸提標馬步三百餘名駐紮鐵門關通永鎮馬步
三百名駐紮灤陽三岔口崇厚所派馬步三百名駐紮灤河橋遊

擊陳啟棟所帶督標馬隊二百名駐紮遵化兼防羅文峪一帶要口吉林馬隊一百名駐紮平安城子兼顧豐玉薊東各路用資聯絡並由山永協派撥得力官兵百餘名於永平府大路一帶梭巡薊州文武及順屬東路廳各於所屬汛地帶領原派兵勇實力巡查長善於九月間不必在羅文峪駐守專防鐵門關迤東山海關迤北各口以扼東來之匪其羅文峪迤西邊口及內地扼要各處並著連成徐廷楷各就汛地派兵巡守劉長佑所派劉祺劉景芳等馬勇三百五十餘名卽畱於蹕路迤南擇要巡防以上各兵除蹕路迤南之兵由劉長佑隨時酌調外其餘遵遷各處及守護兵丁均著歸福興調遣並著劉長佑萬青黎卞寶第崇厚長善連成徐廷楷分飭派出各員弁慎遵福興調度如有玩誤卽由福興嚴參治罪至馬賊飄忽迫聞警派兵追剿賊已遠颺該大臣等尤須

多設偵探互相知照遇有賊蹤由何口竄入卽由福興於各該處就近調派飭令馬隊追剿步隊扼截務令聚殲毋任漏網盛京吉林熱河爲馬賊積慣出沒之區該將軍都統等平時任賊縱橫致煩內地兵力實屬可惡嗣後著恩合阜保麒慶督飭所屬實力查拏務絕根株如有馬賊東來竄近邊門卽一面飛速知照防邊官兵一面派兵追擊毋任來去自如熱河尙有丁起隴等賊目麒慶所派馬步隊三百餘名著毋庸駐紮喜峰口卽行撤回將本境馬賊迅行肅清無再玩泄干咎見在皖豫擒匪未能及時撲滅直隸南路防務亦關緊要劉長佑擬於隨扈時再行抽調南路官兵則該處未免空虛卽著毋庸抽調以免顧此失彼徐廷楷於文祥咨令派兵兜剿並查詢所屬邊牆各口情形並未咨送亦未派兵平日辦事顚預玩視軍情已可概見本日已降旨將該署提督再行

交部議處如再不知振作仍前玩泄定卽從重治罪不貸懷之將此由四百里諭知福興劉長佑麒麟慶長善連成萬青黎卞寶第崇厚恩合阜保並傳諭徐廷楷知之○諭喬松年奏捻蹤回犯皖境迎擊獲勝並派隊會剿情形一摺捻逆陳大濤等東竄之匪回竄皖省阜陽縣境經英翰派遣員史念祖等督隊進至迎仙店迎擊賊向劉家窯一帶敗遁官軍雖小有斬擒並未大加懲創喬松年見調張得勝一軍從固始前往並催克蒙額所部從潁州繼進以期合力痛剿著曾國藩迅飭劉銘傳周口一軍與喬松年所調張得勝等軍會合截擊並著吳昌壽飭令王文行等實力追剿務將阜陽境內竄匪悉數就地殄除此股內有著名匪首牛落紅任柱等並當會檄皖豫諸軍設法兜擒按名弋獲毋任漏網康錦文一軍曾否馳抵許州著曾國藩吳昌壽酌度軍情行令該總兵折赴

皖邊由賊後路夾擊以厚兵力其西竄唐縣股匪著吳昌壽嚴飭張曜等力圖進剿並著官文鄭敦謹懷遵疊次諭旨迅檄姜玉順所部卽赴新野一帶會同豫軍夾擊毋再株守本境其隨棗邊防並當督飭劉維楨等軍認真防禦毋稍疏懈將此由五百里各諭令知之○諭孫長紱奏遵旨調派各軍赴粵會剿一摺據稱林逆竄往長樂翟逆尙踞龍川興甯交界地面濶逆由鎮平移糧東石地方似有他竄之意見飭令婁雲慶等會籌援剿而兵力甚單且須兼顧江境惟有步步爲營以剿爲堵請特派重臣進駐粵境節制三省各軍督剿等語濶逆一日不除粵境一日不靖江閩邊防迄無了期自應合三省兵力圍逼夾攻迅圖殄滅第主客各軍營數既多職分又各不相下且該將領進止機宜須俟各該省督撫指揮調度勢必遷延觀望坐失事機左宗棠廓清浙閩威望素著

著卽督率高連陞等軍馳赴粵境調遣三省之軍相機合力攻剿
所有江西廣東援剿各軍均著歸左宗棠節制以一事權務將鎮
平踞匪剋日殲除林翟諸逆次第掃蕩俾粵省一律肅清全攻克
竟方爲不負委任汪海洋以殘敗餘孽竄踞鎮平粵軍進攻數月
迄未得手殊屬疲玩著瑞麟等嚴飭李福泰方耀等認真攻剿迅
拔堅城如敢再事因循卽著左宗棠從嚴參辦劉坤一計期應已
抵任並著恪遵前旨檄飭江境防軍入粵會剿聽候左宗棠調遣
以期迅速臧功孫長紱另片奏訪問崇仁等縣有匪徒假喫齋爲
名冀圖滋事見經文武員弁拏獲齋匪汪碌保等訊辦等語匪徒
傳教最易煽惑愚民不可不嚴拏懲辦惟見獲各犯供詞多有參
差難保無不實不盡仍著孫長紱督飭承審各員細心研鞫務得
確情如果結黨傳徒謀爲不軌卽當盡法懲治務絕根株該犯供

出之匪首朱明月等業經孫長紱分咨浙江等省一體查拏著俟
咨覆到時卽將作何辦理之處迅速奏聞將此由六百里諭知左
宗棠瑞麟徐宗幹劉坤一郭嵩燾並傳諭孫長紱知之○丙午諭
內閣前因署直隸提督徐廷楷於馬賊竄入境內意存玩視不以
緝捕爲重業經降旨將該署提督再行交部議處茲據文祥奏稱
馬賊竄入內地均在直隸提督所轄境內滋擾爲時十日之久該
署提督未派一兵堵剿屢經文祥飛催調撥標兵隨同一體兜剿
遲之又久始行咨覆而於隨同京兵進剿之處悉置不問且以聽
候總督查覈之語爲搪塞延緩地步情殊可惡徐廷楷著摘去頂
帶交部嚴加議處○諭軍機大臣等本日據御史劉毓楠等奏陳
河南軍情賊勢請飭鄰省督撫合兵會剿一摺馬賊飄忽無常轉
瞬馳騁數百里與髮逆占踞城池盤踞固守情形迥不相同曾國

藩設兵四鎮欲待賊匪竄至皖境迎擊圍剿惟賊匪往往避兵而行曾國藩欲以有定之兵制無定之賊恐捻匪大股未必肯向重兵屯紮處所自投羅網且豫省賊眾兵單以步追馬非獨勢不相及且恐奔逐疲勞不能喙息反致爲賊所乘至地方團堡民寨勢力尤形單弱全恃官軍緊逼賊後使匪眾不暇久駐攻圍庶團民堡寨可期保全若無官軍分段駐紮到處迎剿後路追兵又復步不及馬任令賊騎縱橫滋擾勢必到處殘破田禾悉被踐毀不獨賦稅無出軍餉之匱乏堪虞且恐將來天寒河凍賊匪竄渡河北擾及晉省震動畿疆以見在軍情而論豫省固宜實力追剿曾國藩亦宜另籌大枝遊擊之師前往策應以衛民生而遏賊敵該大臣前奏徐州添練馬隊見在有無就緒業已成軍著擇員統帶進紮豫省適中之地往來遊擊以助豫省兵力所不及兼可扼賊匪

回竄皖省之路徐州距豫省西南相隔千里鞭長莫及曾國藩亦
宜進駐許州就近調度庶豫鄂皖三省均可呼應靈通斷不可拘
泥前奏南汝洛陝不能顧及之說清淮見在平靖吳棠即可進駐
徐州爲曾國藩後路接應以上各節均著曾國藩酌度情形悉心
妥議迅速覆奏其郭松林楊鼎勳兩軍見在鎮江休息著曾國藩
李鴻章會商能否由江路赴楚抑可由陸路赴豫之處並著酌量
調派迅速奏聞如曾國藩移紮許州則鄂省各路將士亦著均歸
曾國藩節制調遣以一事權吳昌壽並著俟曾國藩到許州後移
營前進親督張曜等軍迅將南陽股匪就地埽蕩不可縱令他竄
官文鄭敦謹尤當懍遵疊次諭旨迅飭防邊將士出境會剿不得
畫疆自守自干咎戾其後股竄撲阜陽之賊曾國藩喬松年務當
督飭諸軍會合豫省王文行等軍合力夾擊先將此股殄盡以期

併力移師防剿南陽股匪毋稍延緩將此由六百里名諭令知之
○丁未左宗棠徐宗幹奏康國器一軍在嘉應高山擊賊獲勝後
六月初九日汪逆遣黨五六百人於棠梅亭地方築卡冀阻官軍
進攻之路康國器卽飭吳光亮等乘夜進攻斃賊百餘餘匪遁回
鎮平二十七日康國器親督各營由高思前進七月初二日飭羅
洪標等各率所部進紮距鎮平二十里之程官埠初六日康熊飛
林本羅洪標等分三路進攻石坑排藍坊南坑頭各賊壘均破之
賊匪棄械狂竄共斃賊一千數百名初八日康國器復督各營分
路進剿康熊飛等行抵南坑頭逆首胡瞎子率悍黨三萬餘結陣
抗拒康熊飛等督勇奮擊關鎮邦等繼之逆首胡瞎子被創遁走
官軍追至距鎮平南門八里始行收隊是役共斃賊二千餘名查
汪海洋竄伏鎮平該處居粵閩深山之中巖谷幽險掠食維艱勢

難久踞見在康國器關鎮邦兩軍攻其東南距鎮平縣城不過二十里高連陞黃少春劉清亮分紮武平邊境在鎮平之北距鎮平縣城亦祇四十餘里又飭張恆祥率所部由上杭赴巖前替出高連陞一軍回紮中赤山以助下壩之防王德榜率所部由上杭趨象洞劉清亮率所部移紮盤龍岡劉典赴援江西之軍暫行移紮濯田以助武平見在鎮平東南及東面北面閩軍已互相聯絡長圍蹙賊之勢已成惟西路西南路可通興甯長樂龍川其地距閩較遠必須粵軍自爲截剿非閩軍所能代謀據李福泰函稱花旗各賊竄擾龍川見催卓興先將花旗撲滅而後集龍長之師全力以攻鎮平若如所擬則鎮平西路西南路竄蹤盡斷不難剋期剿除上諭軍機大臣等汪逆竄伏鎮平疊經閩粵各軍圍逼東南北三面已成長圍之勢鎮平西路西南路可通興甯長樂龍川閩

軍尙難兼顧自係實在情形卽著左宗棠剋期進紮將江粵各軍應如何布置務臻周密之處相機妥辦迅奏膚功左宗棠起程以後閩省邊防事宜徐宗幹當隨時咨商左宗棠認真籌辦卓興一軍剿辦花旗股匪情形若何著瑞麟郭嵩燾嚴飭實力進剿迅圖撲滅以便騰出兵力合攻鎮平毋得曠日持久顧此失彼劉坤一孫長紱當恪遵疊次諭旨檄飭江省防軍進紮粵境合力圍攻鎮平以竟全功毋得徒事防守本境左宗棠另片奏王開琳等所部各營餉絀爭鬧情形軍營餉需刻不容緩江省於該軍應發之餉何以任意遲延直至該營滋鬧始行發給適開譟索之端孫長紱於此事辦理實屬不善嗣後新老湘營及婁雲慶所部各營餉銀著劉坤一等源源撥解毋令缺乏將此由六百里諭知左宗棠瑞麟徐宗幹劉坤一郭嵩燾並傳諭孫長紱知之○諭都興阿等奏

抽兵布置後路及前敵剿賊獲勝並請飭總兵移紮勝金關及借撥糧臺銀兩各摺片定邊花馬池兩處爲甯郡後路都興阿已派西蒙克西克嚴防定邊等處並寄信鄂爾多斯貝子扎那濟爾迪併營扼紮花定後路情形稍鬆惟該匪出沒無常不可稍涉大意仍著都興阿等嚴飭西蒙克西克於定邊一帶妥爲防範並傳諭翁同書於花馬池扼要固守遇賊卽剿毋許稍有疏懈貝子扎那濟爾迪統帶蒙古官兵扼要築營亦著該將軍等知照德勒克多爾濟轉飭該貝子務與官軍聯絡聲勢以壯兵威甯郡雖獲勝仗而回匪尙未大受懲創都興阿等進攻日久迄無成效何以表率將士著卽申明軍律迅圖攻克不得再事遷延致干重咎鹽固敗匪與甯夏踞逆相爲聲援狡惡已極卽著該將軍等札飭總兵曹克忠趕緊整併數營扼紮勝金關以杜敗匪西竄並著設法撥兵

將此股逆匪就地殲除毋使擾及他境該總兵失利之後軍裝器械全失並著楊岳斌由省撥給軍裝銀米以資接濟都興阿等營中卹賞雜支銀一萬兩前經戶部議於山東地丁項下籌撥惟道途遙遠解到無期營中待用孔亟著楊能格仍於糧臺按月借撥銀一萬兩一俟協餉解到再行停止成祿等軍前已疊諭楊岳斌酌撥勁兵接替催令出關見在巴里坤待援情形緊迫仍著楊岳斌懍遵前旨派兵接替催令成祿等剋期出關毋使有所藉口任意延宕將此由六百里諭知都興阿穆圖善楊岳斌並傳諭楊能格知之○諭訥爾濟奏剿辦東西兩路賊匪派兵擇要防堵並佐領恆昌救援失利請催大兵出關文麟奏軍務掣肘接仗失利各摺片覽訥爾濟文麟所奏與前次奏報情節相符巴里坤城大兵單東西兩路賊匪勢甚鴟張文麟進剿東路之兵又復在奎蘇接

仗失利該城孤懸絕域已成腹背受敵非得大兵剋日進剿斷難肅清邊境前已屢諭成祿聯捷並鶴齡等軍迅速出關剿賊本日復諭令楊岳斌迅催前進訥爾濟惟當會同總兵何瑄嚴飭滿漢官兵民勇隨時偵探賊蹤嚴密防守毋稍疏懈文麟所奏親身繞道東路速請大兵進剿等情覽奏殊堪詫異該道員前因兵勇潰散退至三塘湖地方雖該處舊糧無存不能招募民勇亦當收集潰兵再圖進取何得遽赴東路請兵置身事外且出關之兵業已屢次降旨嚴催亦毋庸該道員親往迎接文麟身任地方即使他往將來地方有失該道員罪亦難辭文麟惟當擇要駐守與訥爾濟等會商籌剿相機妥辦不得擅離職守自外生成將此由五百里諭知訥爾濟並傳諭文麟知之○諭賂秉章奏敘永官軍越剿滇黔各匪疊勝勞崇光裕麟奏定番州屬土匪謀逆督軍攻破賊

巢生擒首逆並陳遵義地方官紳爲仇委員就近查辦張亮基奏
欽奉諭旨據實瀝陳各摺片滇黔各匪注意川疆欲圖飽掠經總
兵李有恆等將滇匪疊次剿勝並擒賊首蕭大扁刀軍前正法副
將許蔭棠一軍攻剿黔匪亦屢獲勝仗辦理尙爲得手仍著駱秉
章督飭各軍以剿爲防力固邊圉定番州屬土匪程尙汶等以與
吳寶齋睚眦微嫌膽敢聚眾報仇乘機謀逆實屬罪大惡極該文
武督兵剿捕兼旬之內擄穴擒渠不至釀成巨患辦理尙屬妥速
搜捕餘匪及善後事宜並著飭屬妥爲布置遵義地方據勞崇光
等奏稱土習甚壞官紳爲仇恐川軍凱撤之後內外交訐見飭藩
司劉嶽昭就近查辦等語劣紳固須懲創亦必須地方官辦事秉
公方能折服其心格頑化梗該督惟當持平妥辦不可稍有偏倚
或擇其劣蹟昭著者參辦數人則懲一儆百其餘自知斂迹張亮

基覆陳黔省情形摺內語多過當殊屬非是該撫於地方軍務果能事事妥協何至致謗招尤卽局外之人不知局中之苦亦當引咎刻責方合止謗自修之義而乃曉曉瀆辨歷敘衰病自請罷斥欲以負氣之詞作乞身之計此等伎倆豈能逃朝廷洞鑒耶張亮基旣於黔省情形言之鑿鑿卽著於假滿後實心任事力爲其難不得稍涉推諉勞崇光見在逗畱何處卽著懷遵前旨剋期赴滇毋再託故遲延致干咎戾將此由五百里諭知駱秉章勞崇光張亮基並傳諭裕麟知之○允浙江海運經費動用漕截銀兩○戊申諭軍機大臣等文祥奏籌辦剿除馬賊務使淨絕根株請飭盛京等處各豫派得力兵弁聽調一摺據稱馬賊根株多在口外如東省之昌圖廳八面城熱河之八溝哈達等地方回民甚多賭風尤熾往往飽掠一次卽聚賭數月計十冬月間防疏財盡又值大

路車輛通行正其出擾之際宜多雇眼綫節節設探請飭盛京吉林熱河張家口各豫派得力官兵及善於緝捕之員管帶聽調並將駐紮遷安遵化官兵畱防不撤屆時眼綫得有賊匪糾約信息立赴神機營呈報派兵會捕各該地方文武豫備緝捕兵勇臨期合力堵截零星逸匪准民間截拏請賞伏賊並通信黨與責成地方督同差役拏辦各等語所籌甚屬周密著恩合阜保劉長佑麒慶阿克敦布廉至等悉心妥議如該大臣所奏辦賊之法實有把握卽著各派得力兵五六百名備調兵三四百名派善於緝捕之員管帶聽候調撥該匪於十冬月間必復出擾務各密派眼綫偵探懸示重賞節節設探不必專用官弁以防該匪知覺如得有賊匪糾約信息卽飛報神機營及各該處密飭派定各兵會同剿捕各地方文武屆時如不早爲豫備緝捕兵勇合力堵截定將該

管土司從重治罪決不寬貸逸出零匪准民間截拏請賞其伏而未出之賊並勾引通信黨與責成地方官立向差役嚴追所識賊匪姓名住址赴各處責令民間捆出並許從前容忍賊匪及脅從之人拏賊贖罪均與自首無異卽九月後該匪並不出巢亦應如此辦理恩合等其各振刷精神將文祥所陳剿辦馬賊之法詳細嚴密妥籌迅速覆奏聽候諭旨合力舉辦爲一勞永逸之計此外恩合阜保劉長佑麒慶阿克敦布廉至如另有盡絕根株妥善之策亦不妨詳晰密陳以期集思廣益此旨及鈔摺恩合等於奉到時不准有一字洩漏文祥原摺著鈔給閱看將此由四百里各密諭知之○庚戌諭軍機大臣等勞崇光裕麟奏剿辦苗匪疊勝餘匪退歸水城地方設法分別剿辦一摺大定府屬兔場苗匪經官軍擊敗後分竄安順府屬各州縣肆擾旋竄郎岱廳屬之大巖腳

一帶知府畢大錫等督兵攻剿疊挫兇鋒斬匪首黃姓楊姓餘匪敗遁安順府屬已經肅清剿辦尙屬得手該匪受創之後仍往木城舊巢亟應乘機剿撫著卽督飭鄧爾巽等集練堵剿一面察看情形如能真心悔禍始可設法招撫予以自新不得敷衍了事致貽後患其卽岱與水城接壤地方尙有土匪並著飭令畢大錫等分軍接捕淨埽餘氛將此由五百里諭知勞崇光張亮基並傳諭裕麟知之○貴州按察使承齡卒予祭葬卹廕加等如軍營病故例○以席寶田爲貴州按察使開復按察使○辛亥諭軍機大臣等前據文祥奏分派官兵駐紮要隘當經諭令福興於各官兵到防後妥爲調遣見在鐵門關駐紮之直隸提標兵三百餘名三岔口駐紮之通永鎮兵三百餘名尙未到防著福興催調赴防按照文祥所擬駐紮並著於邊口附近之處多派偵探以期周密劉長佑前

奏於隨扈時調撥南路防兵前赴東路堵剿已諭令毋庸抽調該督計當起程著卽將所派劉祺劉景芳等馬勇三百五十餘名照文祥所擬在蹕路迤南擇要巡防仍遵前旨將南路臨洺等處防兵不必抽調飭令仍紮原處免致南路空虛轉有疏虞將此各諭令知之○諭明緒奏伊犁被圍緊急請飭俄兵助剿由俄國匯兌餉銀並請關內大兵赴援一摺該將軍所請催借俄兵助剿之處著毋庸議察哈爾右翼副總管等膽敢與賊勾通移營就賊實屬形同叛逆左翼官兵因此觀望不肯來城其心亦不可問察哈爾營右翼總管鄂爾墜特依副總管車林多爾濟均著卽行革職左翼總管昂克察依副總管巴彥達賴並著一併革職其右翼之從逆官兵等著明緒嚴密查拏按名弋獲卽行正法以昭炯戒違令不到之左翼官兵一併嚴行查辦其由俄國匯兌銀兩一節見飭

總理各國事務衙門與該公使商議妥協再行諭知明緒遵照辦理伊犁兵力單薄疊經諭令成祿等迅速出關大兵指日可到明緒惟當就見有兵勇妥籌布置堅守待援毋得稍涉疏虞新疆尙未到任各員除崇恩常明慶明奎章扎拉芬先後奏請願隨聯捷出關剿賊俱經降旨允准外其常績李雲麟卽著兵部查明咨行沿途地方官催令星速赴任儻再遷延不進卽由該部奏參治罪將此由六百里諭令知之○予伊犁陣亡協領塔欽布等察葬世職○癸丑諭內閣前因盛京將軍玉明等於賊匪聚黨肆擾疏於防範事後復意存含混奏報遲延當經降旨將玉明等交部分別議處茲據兵部等部議奏請將該將軍等分別革職降畱等語盛京將軍玉明奉天府府尹德椿貽誤地方責無旁貸均著照部議革職見任錦州副都統慶春前由山海關副都統簡調盛京到任

未久前署兼管奉天府府尹志和甫到署任均著加恩改爲革職
畱任仍降爲三品頂帶兼管奉天府府尹寶珣孝滿赴任雖在失
事之後惟未於奉旨飭查之先具奏亦屬咎有應得著照部議降
二級畱任不准抵銷至玉明寶珣德椿另案處分仍著該部再行
覈議具奏○諭本日據郭嵩燾奏瀝陳多病蹇拙懇請開缺另簡
能員接任一摺覽其另片所奏一係瀝言廣東軍務貽誤之由據
稱不敢以因病乞休不一縷陳內有廣東事局如臣愚弱非所勝
任疾病因循徒滋怨謗內計之心竟無可爲自效之術等語一係
遵覆御史潘斯濂奏請整頓捕務及提用桑園圍生息銀兩請設
法歸款內有該御史加之苛論總由恩信未孚謬思整頓動輒得
咎請予罷斥等語詞意均涉負氣該署撫另摺所以奏請開缺之
故大率由此除將摺片內所陳各事宜交左宗棠另行查辦外郭

嵩燾以運司擢署巡撫將及兩年委任不爲不專如果粵東軍務吏治實有貽誤爲難之處該署撫不妨據實陳奏請旨遵行至御史潘斯濂所陳各節有關民生利病朝廷豈能不問該署撫如果辦理得宜亦不妨剴切直陳何至以無可自效謬思整頓等詞冒昧入奏殊失立言之體且該署撫從前並無陳奏病狀摺件乃因負氣之故輒請開缺調養曉曉置辯此風斷不可長郭嵩燾著不准開廣東巡撫署缺並傳旨嚴行申飭○署江西巡撫孫長紱奏據婁雲慶咨稱逆首汪海洋盤踞鎮平伺隙思逞婁雲慶已親率馬步各營赴定南長甯交界之鵝公墟並會商席寶田率軍由澄江墟出粵東平遠縣之東石婁雲慶率霆字營由長甯八尺墟出平遠縣之大柘分路並進聯絡閩省武平防師爲合力圍偏之計兼截逆匪圖竄江省會昌瑞金之路並擬令周寬世統銓字營進

扼墓鄉堡王開琳統新老洲營移守鵝公墟以固長甯安遠藩籬
惟定南一口與粵之和平龍川興甯等縣毗連須防長樂股匪乘
虛竄入擬將防守南安之祥字營移扼定南另撥一軍填紮南安
又據吉南賴甯道王文瑞稟稱侍逆李侍賢自永定潰後薙髮逃
至鎮平黃坑地方爲叛勇所獲疑係官軍探卒送至僞天將黃添
元館內李侍賢當以實告黃添元卽報知汪海洋迎往鎮平其初
相待甚優嗣李侍賢舊夥各頭目聞李逆至紛紛往見李逆復屢
次索還舊黨汪逆不許始懷疑忌李逆與舊黨以汪逆不肯分兵
必懷不善又畏其很鷙密謀刺害爲汪逆所覺於七月初三夜間
飭令心腹將李逆刺斃並殺其舊黨僞王宗天將朝將五人復將
李黨分隸各館猜防益甚等情臣查侍逆李侍賢流毒數省罪難
擢髮永定之役竟被漏網今爲汪逆所殺從此除一兇渠其舊黨

遂與汪逆互相猜嫌機有可乘應易奏功婁雲慶與席寶田議定分道並進堪以兼顧會瑞邊防臣見咨湖南提督周寬世已革總兵王開琳各率所部剋日分路前進惟所稱以防守南安之祥字營移防定南查南安地處江粵咽喉亦爲粵逆竄楚要道臣見與湖南撫臣函商另撥一軍填紮南安卽令祥字營馳駐定南庶後路悉臻周密 上諭軍機大臣等漣逆汪海洋久踞鎮平伺隙圖逞近因侍逆李侍賢窮蹙往投索還舊黨互相猜忌汪海洋於七月初三日夜遂將李逆殺斃其黨與多懷疑貳機事大有可乘亟應撥調重兵合力兜剿以殄餘孽前已諭令左宗棠督率高連陞等軍馳赴粵境督剿江廣援軍均歸節制見在席寶田所部精捷營議由澄江墟出平遠縣之東石婁雲慶所部霆字營議由長甯八尺墟出平遠縣之大柘分道並進會合閩省防師實力圍逼兼

截該匪圖竄江省會昌瑞金之路卽著劉坤一孫長紱飛檄該兩軍迅卽取道入粵歸左宗棠調度相機合剿孫長紱見咨行周寬世統銓字營進扼篁鄉堡王開琳統老湘營移守鵝公墟以固長甯安遠藩籬並將防守南安之祥字營移防定南至南安爲江粵咽喉咨明楚省另撥一軍填紮並著照所擬會籌妥辦劉坤一計程應已抵任著卽將到江日期並邊境防守情形隨時確查具奏將此由五百里諭知劉坤一並傳諭孫長紱知之○署廣東巡撫郭嵩燾奏臣渥邀恩命權撫粵東蚤作夜思原期補救萬一無如年來疾病侵尋漸至增劇伏念粵東尙屬有爲之地巡撫又兼得爲之權臣以疾病餘生深恐貽誤地方惟有仰懇天恩准予開缺特簡賢員巡撫粵東實於地方有裨又奏查廣東軍務約有數誤本年五月賊勢沿潮州北竄由武平以趨鎮平其時郭松林楊

鼎勳兩軍駐紮雲霄屢與臣約由閩赴粵而鎮平失守二十餘日李福泰並未稟報迨臣得楊鼎勳函始商之兼署督臣瑞麟委員運糧往迎已由左宗棠奏飭回蘇坐令窮賊入粵不得大枝勁旅剿辦此一誤也馮子材自江南回粵臣與接談軍務具有條理其將弁若楊武賢關松志楊青山湛恩榮大率樸幹椎魯深堪倚恃臣曾言於前督臣毛鴻賓以李福泰本非知兵又素性慈柔過於粉飾宜令馮子材接辦東江軍務毛鴻賓具奏後又將卓興調赴東江改奏馮子材辦理羅定股匪迨羅定事竣霆軍叛卒適偪樂昌臣又屢商瑞麟飭馮子材督辦均未允從用兵至四萬餘僅恃李福泰展轉周旋不諳調度此又一誤也湘淮各軍由曾國藩定立營制以五百人爲一營整齊約束粵民强悍甚於湘淮而自來募勇章程極爲廢弛臣前與毛鴻賓商定營制仍以五百人爲一營

乃方耀始留三千人爲六營漸增至九千餘人鄭紹忠五百人爲一營漸增至五千人迄未依照辦理方耀防堵平遠數月聞賊至而先避全軍潰散鎮平賊退鄭紹忠跟蹤收復數月而賊返撲致損銳氣卓興住省兩月索舊欠二十萬以行由老隆調赴興甯徑報率勇歸家已而復稱各勇均經招回瑞麟概不查問此又一誤也查粵東軍務未嘗講求實際從前額餉之外動懸賞號數萬浪費營私不知所紀近年用兵至四五萬人餉糈稍缺卽驕蹇不服調度加以幕客門丁書吏扶同罔利惟懼事權旁假聳弄督臣防干預前因長樂失守惠州戒嚴經司道等會商請臣駐紮惠州藉資鎮壓乃督臣面斥司道責臣越職侵權臣以惠州爲省垣屏蔽瑞麟兼任將軍職在居守臣躬親禦賊仍請瑞麟具奏似非越職而以此大觸忌諱遂致宣言於眾謂撫臣欲加整頓一麥卓興

而卓興反一參方耀而方耀反此二人恨撫臣方深一出省卽舉兵圍之索餉臣於卓興方耀惟公事交涉稍加勸誡瑞麟專與交歡一時負氣昌言於眾萬一興亂咎將誰歸臣查瑞麟慈柔寬裕狃於見好如去年九月旗營因積欠譁譟立時籌放數千金本年五月譁譟又籌放數千金始終不懲儆一人以粵東犷悍之區人心浮動之日又當軍務繁興庫儲空乏竊憂其難以持久如臣愚弱因循徒滋怨謗實無可爲自效之術非有剛強嚴毅之員接任巡撫幫同瑞麟經理恐隱憂日深不可收拾仍乞嚴飭瑞麟先將該署幕友徐灝擯退稍清其流無任盤踞把持敗壞風氣實於粵東大局有裨上諭郭嵩燾奏請開缺一摺另奏廣東軍務約有數誤請將督署幕友徐灝擯退請飭左宗棠督辦鎮平賊匪並覆奏御史潘斯濂條陳各片郭嵩燾與瑞麟意見不合致多掣肘何

妨據實陳奏乃竟稱疾乞退殊失和衷之道其所陳廣東軍務致誤之由如李福泰粉飾軍情鎮平失守二十餘日李福泰並未稟報方耀防堵平遠數月聞賊至而先期避去致令全軍潰散卓興駐省兩月索餉二十萬由老隆調赴興甯徑報率勇歸家已而復稱各勇均經招同瑞麟概不查問長樂失守惠州戒嚴郭嵩燾欲駐紮惠州瑞麟將會商之司道面斥且對眾宣言巡撫欲加整頓卓興方耀將反如果實有其事實屬有意掣肘幕友徐灝係屬何人郭嵩燾但請擯退而未明言其如何盤踞把持敗壞風氣廣東盜風近來能否稍戢桑園圍等處生息銀兩已否歸還前有旨諭令左宗棠馳赴鎮平督辦軍務將廣東江西福建三省兵勇節制調遣刻下計已接奉此旨卽著就近將郭嵩燾所參各節確切訪查該署督撫因何不協究竟爲公爲私據實覆奏請旨遵行粵省

軍務方殷若疆臣各存意見不能和衷將士復粉飾軍情不肯盡力大局何堪設想左宗棠秉心公正諒不肯稍涉偏徇代人受過郭嵩燾摺片四件均著鈔給閱看本日又據孫長紱奏婁席兩軍見議取道赴粵並探聞李侍賢爲汪逆刺斃兼殺其舊黨僞王宗天將等五人見在李逆舊黨猜忌益甚機有可乘等語左宗棠當懷遵疊次諭旨迅速赴粵將江西閩粵各軍妥爲調度以期早日竣事李逆是否被殺並著查明具奏將此由五百里諭令知之○甲寅諭軍機大臣等前盛京將軍玉明等奏匪犯投首見擬籌辦情形並請將劉訪一犯監禁待質各摺片大孤山匪犯徐五見因徵兵往捕遽向城守尉奕榕處乞降玉明等因該處濱臨山島恐煩兵力擬卽乘機駕馭察看情形妥籌辦理固屬因勢利導之策第該匪並未大受懲創豈肯遽作降計且官兵遣撤歸伍僅畱馬

隊一百名在彼彈壓更難保不從而生心著恩合於到任後督飭
奕格等認真察看如徐五實係因回勇滋擾激成釁變此次投誠
實出真心效命方可奏明請旨寬其既往予以自新儻或陽奉陰
違心懷叵測卽著相機勦辦永絕亂萌劉錦愷等犯並著飭屬嚴
拏務獲劉訪一犯旣須監候待質卽著牢固監禁毋稍疏縱調署
岫巖城守尉復州城守尉寶山招募回勇旣不親身督帶亦未派
委妥員管轄致令激成釁端又不確實具稟難保非有心掩飾著
交部議處署岫巖城通判候補同知景灝未能確查隨同率稟亦
有不合著交部察議本日據劉長佑奏捕役叅盜貽患鄰封請妥
籌約束嚴定賞罰等語實爲目前切要之務著恩合寶珣麒慶飭
屬一律稽查隨時訪察務使賊匪無包庇之人州縣收指臂之助
方能清盜源而靖奸宄劉長佑另片奏此次賊目黃洛幅等結夥

猖獗難保不恃有人護庇等語著麒慶迅將紀盛汶供出之哈達同民丁起雲丁起隴張洪禮三犯提緝到案嚴切根究將在事各犯悉數捕獲如再延緩卽治以通賊之罪該都統務當遵旨嚴辦以期漸戢匪黨不得稍有徇縱劉長佑片二件著分別鈔給閱看將此由四百里各諭令知之○諭劉長佑奏山東梟匪兇燄未熄亟宜及早殲除等語山東濱海之區鹽匪聚眾滋事譬不畏法自閻敬銘到任以來雖疊次捕獲而此拏彼竄究未大受懲創見在該匪在滄州鹽山等處拒捕抗官且據商人晉源昌稟報有案若不趕緊緝捕盡法究治何以重饒政而遏亂萌著閻敬銘按照劉長佑所陳各節嚴飭所屬遴派弁役實力巡緝務將著名首匪認真訪拏務獲究辦其畱防東路兵勇如何騰出卽挑選精銳數百名揀派明幹將弁管帶前往鹽滄一帶與直隸各營汛會同捕拏

並准該管地方官遇有梟匪特眾拒捕卽行格殺勿論庶匪類知所懲創不敢肆意橫行原片著鈔給閱看本日明降諭旨將恩錫補授奉天府府尹潘鼎新補授山東臬司盛京事務緊要著閻敬銘傳知恩錫令其迅速起程毋稍延緩丁寶楨見已回省潘鼎新仍著駐紮濟甯統帶淮勇實力防剿該臬司從前屢立戰功朝廷特加簡擢卽著傳知該員令其益加奮勉以副委任將此由四百里諭令知之○諭曾國藩奏移紮徐州整理馬隊並陳近日軍情一摺僧格林沁舊部馬隊經曾國藩詳加裁汰分別畱撤並將畱營兵丁分派各員統領管帶其烏爾圖那遜所帶並土默特各馬隊均著俟周家口防務稍鬆再由曾國藩分別汰畱力行整頓富森保所帶馬隊卽著畱於湖北防剿至牛落紅等股匪回竄阜陽縣境占踞各圩雖經英翰防兵截擊略有斬擒並未大受懲創張

得勝克蒙額兩軍見已由喬松年檄赴潁州援剿仍恐兵力尙單
曾國藩務當飭令色爾固善並周盛波劉銘傳等軍迅赴潁郡與
喬松年所派各軍四面兜圍就地殄盡不可再令逸往他所又致
滋蔓難圖太和阜陽等處民團素稱得力該大臣尤當設法鼓勵
令其到處截擊以助官軍聲勢至張總愚等股匪竄擾唐縣等處
逼近陝楚勢燄尤張陝南兵力空虛鄂豫兵力亦單恐未能制賊
奔突曾國藩節制三省而山東直隸見無軍務僅係河南一省自
應一律籌畫布置隨時援應不得拘泥從前十三府州之說置豫
省軍情於不問至鄂省東西兩路逼近賊氛防剿情形甚關緊要
所有楚北軍務自應由曾國藩節制調遣以一事權該大臣務當
遵奉前旨妥籌布置賊蹤奔突靡定軍情旦夕異宜許州爲四路
適中之地前曾諭令該大臣移紮該處就近調度以期呼應靈通

著卽斟酌情形妥籌辦理楊鼎勳郭松林兩軍並著催令迅赴該

大臣軍營聽候調遣以厚兵力將此由六百里諭令知之○以恩

錫爲奉天府府尹潘鼎新爲山東按察使

由江蘇常鎮
通海道遷

○命已革

署四川總督曾望顏以四品京堂候補○乙卯諭軍機大臣等吳

昌壽奏豫軍力單請責成皖楚會剿一摺張總愚等股匪圍攻新

野縣城旋退竄南岡經張曜等擊敗追至鄧州鎮平該匪遂分踞

南陽鄧州鎮平等處其賴陳等逆復自阜陽竄回固始息縣新蔡

攻破民寨多處並分踞沈邱縣屬之瓦店等寨俱經王文行蔣希

夷各軍竭力擊退覽所奏各情賊雖暫時擊退而裹脅日眾勢燄

日張民寨殘破日多官軍餉需匱乏復經裁減數成賊眾兵單幾

有不能支持之勢匪眾全聚豫境若非皖鄂兩省合力助剿將來

逆燄愈張勢必皖鄂並受其患見在姜玉順一軍已到新野劉銘

傳康錦文等軍均追至黃牛嶺著官文曾國藩喬松年鄭敦謹嚴飭該將領等視賊所向與豫軍會合爲一相機剿辦毋得此前彼卻仍存畛域之見以致有無實坐談事機至皖豫各軍援剿豫省若遠候統兵大臣及本省督撫文檄爲進止鞭長莫及勢必坐失機宜前經疊諭曾國藩移紮許州節制皖豫鄂三省軍務就近調度以期呼應靈通著該大臣悉心籌度妥行辦理將此由六百里各諭令知之○左宗棠徐宗幹奏康國器一軍進駐鎮平將石排坑等處賊壘掃蕩後七月十三日汪海洋復率悍黨二萬餘分路直撲程官埠營壘營官林木等督隊猛戰殺賊二百餘名康國器復飭康熊飛等各率兵勇繼進又斃悍賊五百餘名擒斬僞神將朱三元等多名賊遂敗竄十四日汪逆復糾逆黨萬餘來犯康賊詭謀必虛攻程官埠待高思各軍出援卽圖襲我後路

當飭林木等率軍往程官埠助剿一面飭康熊飛等嚴守營壘挑選銳卒伏於石灰岡烏泥嶺兩山之間伺賊竄入擊之汪逆果嗾胡瞎子何明亮等率眾撲程官埠營壘林木等俟賊撲近排槍轟擊斃賊甚多汪逆令胡瞎子等牽掣程官埠各營親率僞奉王黃十四僞王宗汪大力等二萬餘人徑撲高思官軍營壘康熊飛率隊詐退誘賊入伏吳光亮等從山坳突出伏兵盡起僞王宗汪大力中槍立斃僞奉王黃十四擊傷右骹墜馬落澗而遁官軍縱擊陣斃僞參護汪得勝等悍賊六百餘名賊敗退山巔汪逆勒令諸賊拌死回關康熊飛吳光亮等各率所部前後夾擊槍傷汪逆左腕羣逆急昇之走賊隊大亂立斃悍賊四百餘名吳光亮等分路鈔截賊墮巖落澗死者不下數千林木等同時將胡瞎子何明亮兩逆擊敗斬賊四百餘名汪海洋胡瞎子等遁回鎮平共計陣斃

悍賊二千餘名是日張恆祥亦率隊至分水坳一帶察看地勢遇賊數百擊走查竄粵餘逆惟汪海洋一股兇狡最著此次經康國器督軍勦敗殲斃悍賊甚多兇燄頓衰據獲賊供稱鎮平之賊久思由武平竄江西因汪逆新被重創一時猝難遠竄見在劉典所派總兵劉明燈等已抵武平臣等卽飭高連陞黃少春兩軍由巖前中赤進駐廣福鄉以攻鎮平之北劉典所部填紮下壩盤龍岡爲各軍聲援兼顧江西其王德榜一軍由上杭象洞前進與高連陞黃少春康國器各軍互相聯絡粵軍如能嚴扼鎮平西南不任賊蹤紛竄閩浙各軍由鎮平東路北路東南路節節逼剿自可漸合長圍以期聚殲頃據廣東藩司李福泰稟報長樂縣城又被花旗賊匪竄陷見催卓興鄭紹忠等軍往剿是該藩司前議先將花旗撲滅再行會規鎮平既勢有未能閩軍亦迫不及待而方耀鄧

安邦兩軍見雖駐鎮平之南能否力扼西南尙未可知此次康國
器一軍勦賊出力弁勇可否由臣等查明擇尤請旨獎勵陣亡之
擬保守備把總區昌應請飭部照守備陣亡例議卹上諭竄粵
餘逆惟汪海洋一股兇狡最著此次經康國器督軍痛勦殲斃悍
賊甚多汪逆身受重創一時猝難遠竄自應以勦爲防步步圍逼
方能聚而殲旃左宗棠見飭高連陞等進逼鎮平之北令劉典王
德榜等分屯要隘聯絡聲援惟鎮平西南一路必須粵軍嚴扼其
衝而花旗股匪竄陷長樂卓興等軍爲所牽綴僅餘方耀鄧安邦
兩軍恐不足以遏賊奔突著瑞麟郭嵩燾督飭方耀等實力扼守
一面嚴飭卓興等將長樂縣城迅圖攻克殄滅花旗一股庶得早
日合兵殲除汪逆席寶田婁雲慶等軍前已有旨令其馳赴鎮平
會勦卽著劉坤一孫長絨遵照前旨迅速調派毋得稍分畛域左

宗棠前已有旨令其馳赴鎮平督辦軍務卽著懍遵前旨迅速前進妥籌一切如有不遵調遣及遲玩軍務者並著查明參奏以一事權長樂文武下落著瑞麟等查明具奏將此由六百里諭知左宗棠瑞麟徐宗幹劉坤一郭嵩燾並傳諭孫長絨知之○諭景紋奏藏兵攻剿瞻對大勝派員督催迅剿老巢一招據稱藏兵於六月間攻毀瞻逆碉房大寨多處各寨賊匪均已投誠惟工布朗結父子所居新舊賊寨暨業爾巴六谷瑪牙瑪頓柱賊巢尙未攻破見在設法趕緊進攻老巢等語此次藏兵同心進攻瞻對甚爲出力業經景紋犒賞茶包等件並籌款添補軍火俾番兵等踴躍進攻迅圖剿滅辦理甚是卽著嚴飭史致康迅由道塢北路督催漢土兵勇反正各夷設法進逼巢穴毋稍鬆勁察木多糧員童沛霖遊擊慶衡旣於地利熟悉著飭令該員等認真彈壓督催以期早

爲藏事景紋見已由察木多起程赴藏著就近體察情形相機妥辦俾藏地得以安謐抵藏後卽將應行查辦事件迅速查明覆奏將此諭令知之○諭林鴻年奏川省撥項太少不敷進取暨滇省舍川別無他策各摺片所陳各節餉需未充不敷進取自係實在情形劉嶽昭唐友耕兩軍餉項雖由川省接濟而林鴻年已紮敘州待餉尤亟著崇實駱秉章嗣後仍係按月妥籌接濟不得以先行籌撥二萬兩遂置滇餉於不顧滇省疾苦之區自不能不賴川省籌畫而各省勸捐欠餉各款爲數不少並著林鴻年分別咨催俟餉項稍爲充裕卽當相機進取摺內所陳滇省情形尙爲詳悉著審時度勢次第規取該撫身膺疆寄自宜力任其難不得以無可措手爲詞致滋延誤將此由六百里各諭令知之○諭前經降旨將田興恕發往新疆並諭令崇實駱秉章卽行派委妥員剋日

起解茲據總理各國事務衙門奏稱前接崇實等函稱田興恕因病尚在涪州未經起解見復據法國使臣面稱田興恕依然在涪州安住直如無事之人等語田興恕一案前經總理衙門再四籌商始行定議該革員種種妄爲貽誤軍事厥罪甚重業經從寬問擬遣戍已屬法外施恩若再聽其託病耽延不獨有意抗違情殊可惡抑且無以示信於外國崇實駱秉章詎見不及此著卽嚴派妥幹之員馳赴涪州無論田興恕病之真僞卽刻起解前行不准再有遲滯至張茂萱謝葆齡二犯已據勞崇光等奏稱由黔解川是否業經解到並著崇實駱秉章於該革員等到川之日卽行派員遞解陝西轉遞甘肅毋稍延緩將此由五百里各諭令知之○署兩廣總督瑞麟等奏遵查霆營叛卒由江粵交界邊境潛抵興甯縣屬羅浮司因官軍移剿花旗股匪遂乘間疾走慈溪依倚凍

逆爲援孫長紱所奏叛卒乞降實係傳聞之誤報聞○撥殺虎口
正稅銀一萬兩濟巴里坤軍糈○予河南陣亡遊擊張萬均祭葬
世職○丙辰諭軍機大臣等吳昌壽奏豫軍會同江皖各軍攻拔
張寨等處賊巢並新蔡寨長出力請獎各摺片本日已明降諭旨
宣示出力各員照所請獎勵矣蔣希夷一軍會同康錦文唐殿魁
劉盛藻攻拔張寨等處對河侯信寨內牛落紅竄出被我軍殲斃
殆盡乘勝追至瓦店橋口復有斬擒見於劉窯一帶駐紮再圖進
剿該逆分股一竄阜陽三河尖一竄新蔡汝陽邊馬已至西華鄧
城寨等處昨據吳昌壽奏豫軍力單請責成皖楚會剿諭令官文
等嚴飭將領與豫軍會合爲一相機剿辦見在蔣希夷業已會同
江皖各軍攻拔張寨等處獲此大捷足見各省兵力會剿自有明
效正可乘勝掃蕩轉戰而前以收破竹之效著官文曾國藩喬松

年吳昌壽鄭敦謹懷遵昨日諭旨嚴檄在事各將弁通力合作會
籌進取務將東西兩股逆匪迅速殄除以期根株盡拔疆圉肅清
不可稍有鬆勁致令賊勢復熾逆首李允圖攻新蔡縣東鄒寨經
寨長鄒子興率眾擊剿該逆雖已退回頓家岡等處尙未大受懲
創恐其復來報復亟須官兵接應著吳昌壽督飭兵勇迅速前往
頓家岡一帶盡心剿洗毋任蔓延爲患將此由五百里各諭令知
之○諭都興阿等奏遵保分剿黃河兩岸竄逆大勝出力員弁已
明降諭旨照准矣另片奏請將已革葉爾羌參贊大臣景廉賞還
頂帶景廉係告病人員不候諭旨私行進關厥咎甚重當此新疆
多事之時自未便稍涉寬容致啟效尤之漸景廉著不准賞還頂
帶仍責令總理營務糧臺俟甯夏克復再由都興阿等奏乞恩施
都興阿又片奏已到甘一載有餘籌辦稍難自覺心力頓減精神

損耗請令楊岳斌穆圖善督辦等語楊岳斌身任封圻不能不在
省會駐紮都興阿督辦甘肅軍務甯夏一城日久未復未免師老
兵疲姑念該處地偏餉絀尙非該將軍籌策無方惟該將軍總當
以軍務爲重不得稍存畏難之見致涉推諉仍著懍遵疊次諭旨
振刷精神整飭隊伍與穆圖善籌商制勝之策令西蒙克西克等
嚴防定邊等處令翁同書於花馬池扼要固守仍將甯夏府城迅
速克復力圖報效以副委任湖北應解月餉二萬兩已於七月十
五日諭令該省仍照前議籌撥著都興阿等卽行飛催趕解以資
接濟將此由六百里各諭令知之○以甘肅花馬池剿匪獲勝賞
已革安徽巡撫翁同書四品頂帶○諭劉長佑籌給各關隘防兵
口糧○丁巳以鍾秀爲陝西布政使胡肇智爲陝西按察使

由福建汀

漳州府

○戊午諭軍機大臣等喬松年奏捻逆經官軍擊敗竄併豫

境見籌防剿一摺捻逆任桂牛落紅回犯皖境經皖防各軍進剿
攻破高圩賊巢餘匪敗遁該逆經此次創懲兇鋒已挫亟宜乘其
喘息未定合力兜剿以期一鼓殲除著曾國藩喬松年吳昌壽嚴
飭派出各軍視賊所向前截後追務將此股賊匪迅速剿除毋令
再與前股勾合其竄往南陽等處之賊仍著吳昌壽督飭張曜等
軍會合楚省姜玉順一軍實力夾擊毋任蔓延喬松年另片奏陳
國瑞一軍見已撤去五營所存不過三四十人與康錦文一軍數
日相等東省向解郭寶昌之餉應令陳國瑞與康錦文兩軍各半
分給等語著閻敬銘即將前項應解餉銀按月分解豫皖兩省轉
發該兩軍支放正在寄諭間據張之萬奏稱二十日夜間遙望東
南火光不絕詢之進省難民據稱賊蹤已至通許縣之底閣寨等
處或云已至陳畱地方距省城甚近惟前日據吳昌壽奏稱會剿

捻匪攻拔張寨等賊巢向阜陽新蔡等處奔竄張之萬見奏賊蹤
偏近省垣與吳昌壽前奏情形稍異賊蹤剽疾奔突靡常著吳昌
壽確探賊蹤如實有北竄之勢卽酌量緩急情形撥兵回顧省城
並兼防河北一面知照直隸山東督撫嚴密防堵毋任偷渡張之
萬見在省城著俟賊蹤稍遠卽行馳赴工所督辦修防將此由六
百里各諭令知之○諭駱秉章奏滇省捐輸仍由該省設局辦理
並據劉蓉奏甘餉窘乏殊常請飭四川督臣督飭司道會同委員
籌辦各摺片川省雖屢經捐輸而糧賦輕減較陝甘情形迥不相
同川省司道勸辦約可得三十萬金何以忽行停止諒駱秉章恐
各省紛紛效尤川省民力不支遂致已成之局中止惟見在甘省
軍營日放灰麪榆皮尙不得飽設有譁潰卽川省豈能安枕著崇
實駱秉章不分畛域督飭藩司等會同毛震壽斟酌情形妥籌辦

理趙長齡甫由川省擢任於該省情形諒必熟悉並著會商妥辦至林鴻年於擢任滇撫後遲久始抵敘州於滇省軍情布置從未籌及屢以索餉爲遷延之計若與陝甘同時並舉勸捐恐川省民情未協並著崇實等妥商辦理林鴻年卽遵前旨赴昭通駐紮聽候崇實等籌辦劉蓉另片奏克復吳旂鎮擒斬逆酋惠喜中並疊次攻剿竄回獲勝各等語此次陝西防軍鄔太愚等攻剿尙未得手著劉蓉仍飭該將領等妥爲防範毋稍鬆懈劉蓉又奏陶營潰勇復入陝疆不服開導拒殺官軍等語陶茂林勇丁在甘潰散已屬目無法紀迨至寶雞東關仍敢抗殺官兵實與叛逆無異卽著劉蓉飭令副將彭體道等實力兜剿毋稍姑息其尙有在甘之勇丁並著楊岳斌妥爲駕馭毋得操之過急致使貽患鄰封是爲至要將此由六百里各諭令知之○諭李鴻章奏黔匪竄越楚界偏

近晃沅卽經官軍擊退一招貴州苗匪分股竄撲思州旋卽敗退
惟竄擾天柱之匪勾結後山洞苗匪掠至竹樹扶羅舊礮等處周
洪印戈鑑等督軍分路剿辦匪黨竄歸後山洞一帶惟該匪雖經
敗退距晃州轄境不遠難保不乘機回竄卽著李瀚章嚴飭周洪
印戈鑑等統帶官軍由禾灘等處分道進取以剿爲防毋任擾及
楚境致滋延蔓並著張亮基裕麟檄飭黔省官軍與楚省兵勇聯
絡聲勢兩面夾擊將苗教匪黨悉數殲除不得妄分畛域任令該
匪出沒貽患鄰封此次接仗尙未大挫賊鋒在事出力人員著李
瀚章暫行存記俟續有功績再行奏請獎勵李瀚章另摺奏查明
湖南米價增昂銀價減賤若將本年漕糧徵收本色納數倍增民
力實有不逮等情所奏自係實在情形所有該省本年漕糧著准
其仍徵折色提充京餉俟來年開徵時能否改收本色該撫再行

酌覈辦理具奏將此由五百里諭知李瀚章張亮基並傳諭裕麟知之○予湖南陣亡訓導姚復奇甘肅陣亡副將寨沙春等祭葬世職○庚申諭軍機大臣等阜保奏盜匪聚眾滋擾續派官軍剿捕備陳吉林全省大局籌餉剿賊並請簡員署理副都統玉明等奏追剿昌圖盜匪獲勝請將協領恩科開復處分各摺片昌圖盜首徐占一烏痣李等股聚散無定見在分股逃逸難保不到處裹脅轉致愈聚愈多著恩合阜保富平阿寶珣嚴檄派出官兵通力合作會同接捕務將此股盜匪悉數殲除不得因去賊稍遠卽形疏懈致令該逆徧地蔓延釀成不了之局阜保所稱地勢遼闊兵單餉絀見擬按照鋪商原辦日釐各捐豫支一年經費揀選兵丁購買馬匹視賊所向實力追剿以團練爲各路之應援到處截擊以獵戶爲入山之嚮導跟蹤接拏等語均著照所擬辦理該署將

軍務當振刷精神廓清邊圉但須實心實力不可徒事紙上空談
有名無實並著與恩合會同商酌以清盜源阜保請簡員署理副
都統各缺一俟簡畀有人卽令迅速前赴署任此次盜匪由昌圖
竄至長春廳一帶恩科督兵追剿並未能痛殄逆氛玉明等請將
恩科暫行革職處分開復之處著毋庸議前有旨諭知恩合酌量
出省督剿刻下富平阿已抵新任該副都統曾經出師著績著恩
合體察情形卽商令富平阿帶隊剿賊以資得力省城防守事宜
著恩合妥協布置以期有備無患將此由五百里各諭令知之○
諭官文等奏楚軍見已馳抵新野並請俟賊蹤稍定再令成大吉
出境會剿各摺片此股髮捻由皖北悉眾西趨行蹤靡定楚省邊
防自不可稍涉鬆懈官文等見派姜玉順一軍馳赴新野迎擊並
令譚仁芳督率四營會合姜玉順併力剿辦著卽嚴飭姜玉順等

會同豫軍認真攻剿迅殄逆氛官文等請飭應行會剿省分無分
畛域先將本省門戶嚴行戒備一面專派勁旅前往會剿等語與
歷次諭旨相合除本日已諭知曾國藩酌辦外卽著官文等檄飭
成大吉藍斯明劉維楨等軍嚴密布置毋許該匪闖入邊境俾姜
玉順譚仁芳等得以拔隊跟追不至回顧楚疆方爲妥善官文等
另摺奏提督鮑超見已抵鄂募勇赴江助剿等語前次霆軍叛勇
據粵省奏報已與汪逆句合抗拒官兵其婁雲慶所帶部勇前亦
因索餉譁謀必須鮑超親往整頓方可復成勁旅著傳諭該提督
趕募四營馳赴江粵邊境聽候左宗棠調遣汪逆身受重傷困守
鎮平鮑超打仗素能奮勇左宗棠得此生力一軍會督門諸將
鼓勇前進諒不難剋日殲除以慰廛念鮑超此軍應支月餉見已
由湖北籌給兩月以利進行該提督抵江後卽著劉坤一孫長絨

就近籌撥毋令缺乏將此由五百里諭知官文左宗棠劉坤一鄭
敦謹並傳諭鮑超孫長絨知之○諭閻敬銘奏髮捻逆匪由豫復
竄東境派兵堵禦一摺逆眾循熟路東趨有總兵楊飛熊副將王
心安等駐守並有潘鼎新一軍在濟甯扼紮諒該逆不敢深入爲
患惟西股張總愚等由棗陽折回南陽分擾唐縣新野其勢亦欲
東趨恐分股繞越則兵分力單勢難兼顧著曾國藩嚴飭在防將
士遇賊卽擊並迅速酌派勁旅繞赴豫省如賊眾分股繞越亦須
分兵截擊毋任回竄張總愚股匪在新野一帶吳昌壽當會合楚
軍實力剿辦截其東竄之路如與東股會合著吳昌壽喬松年派
兵追剿不得以賊已出境稍分畛域閻敬銘已令民間將積穀運
入堡內並令衛榮光督率礮船防河將沿河船隻盡行提歸北岸
東昌范縣等營均歸該道調度著責令認真辦理不得有名無實

如縱令該匪北竄必惟間敬銘是問潘鼎新一軍蓄銳日久應如何檄調進剿著曾國藩酌度機宜一面調派一面奏聞以資得力本日據官文奏請飭會剿捻逆省分先行戒備本省門戶一面專派勁旅一枝前往專心會剿何省之兵卽由何省供支糧餉再得老成持重之大臣如曾國藩者提綱挈領居中調度可計日蕩平等語與節次寄諭正相脗合前諭曾國藩進駐許州之處卽著酌度辦理將此由六百里各諭令知之○諭都興阿等奏遵籌後路布置情形楊岳斌奏香客劫立耶教督兵剿擒首逆飭蕭慶高赴隴州協剿各摺片都興阿等因雷正綰等軍挫敗抽調西蒙克西克馬隊前往定邊協力堵剿以遏賊勢東趨旋有山南竄匪千餘直撲甌井堡經西蒙克西克等帶隊援剿擊退惟甯條梁爲商賈輻湊之區逆回垂涎已久僅有羅承勳一營駐紮柳樹澗相距四

十餘里不足以資屏蔽著楊岳斌劉蓉飛檄延綏鎮總兵陶茂森
統帶沐標官兵就近前赴甯條梁督同羅承勳部勇實力扼剿劉
蓉前派鎮西軍在靖邊一帶巡防卽著飭令該軍擇要扼紮務與
甘軍聲勢聯絡嚴密布置以期有備無患雷正綰所部失利遺失
旗幟號衣甚多恐爲逆匪所得假冒官兵圖逞狡計著都興阿楊
岳斌等通飭各營嚴加防禦該軍見紮何處作何整頓並著確探
具奏都興阿等當懷遵疊次諭旨將甯夏郡城力圖攻拔以孤賊
勢仍隨時體察東西兩岸賊情抽撥重兵相機剿辦務將竄匪悉
數殄滅毋任蔓延如探有東竄信息並卽隨時飛撥重兵前往堵
剿其安定一帶踞匪東竄張家川蓮花城等處意圖回竄陝疆著
楊岳斌劉蓉嚴飭各州縣激勵團勇實力堵剿一面飛檄蕭慶高
馳赴隴州探明賊蹤協同兵團嚴密抵禦毋任闖入陝境靖遠縣

香客丁建善等倡立邪教聚眾謀爲不軌經楊岳斌親督彭楚漢等剿捕將丁建善擒獲正法餘眾解散辦理尙爲妥速惟逆目陳忠孝在逃未獲且縣城暨省垣各衙門均有伊等細作亟應慎密搜捕以絕根株著楊岳斌遴委員弁務將逆目陳忠孝及城中夥黨嚴密搜緝毋任漏網其北山及金縣回匪尤不可毋稍疏忽成祿鶴齡兩軍何日西行並著查明具奏將此由六百里各諭令知之○諭景紋奏藏兵攻剿瞻逆獲勝克復地方一摺藏兵攻剿瞻逆疊次獲勝生擒瞻逆長子東登工布父子次子僧人四郎生格等東登工布等自願寄信與工布朗結帶領番眾投誠先將薩伽喇嘛德爾格特土婦母子等放回乃工布朗結得信後將德爾格特長子長女等放回將薩伽喇嘛德爾格特土婦等仍畱在寨亦未率眾投誠是其怙惡不悛卽准投誠難保不意存反覆著卽飭

令史致康督催藏兵迅速進攻乘瞻逆窮蹙之時一鼓殄除以期
早日蕆事將來善後事宜均責成史致康妥辦景紋著剋日赴藏
妥籌辦理一切以副委任將此由五百里諭令知之○以江浙蘇
松杭嘉湖各屬被水命李鴻章等籌款賑恤○壬戌諭內閣左宗
棠等奏請將福建鄉團殉難男女立祠建坊等語上年九月賊竄
福建龍溪縣地方該處陳社鄉團守備陳國香等激勵族眾保守
鄉寨殺賊甚多十一月間賊眾環攻男女被其焚殺者七八千人
該社鄉民聯團禦賊深明大義實堪嘉尚且於被圍之日誓死不
屈殉難甚烈尤屬大節懍然殊堪憫惻所有龍溪縣陳社鄉團被
害男女著准其建祠入祀並將該社賜名忠義鄉以彰忠節○諭
御史汪朝榮奏伊犁參贊大臣聯捷奉命出關剿賊行至山西索
餉逗畱騷擾不堪至陝西境內大索車輛講明折價在陝則乘坐

八人大轎並用三軍司命大纛近來新放各路辦事大臣均以聯捷軍營爲託足之地聯捷在行營日與開筵痛飲不思出關剿賊糜餉孤恩請飭查辦等語著楊岳斌按照該御史所參各款秉公查辦據實參奏毋稍徇隱聯捷屢有嚴旨諭令出關剿賊若如該御史所奏將其撤任聽候查辦聯捷轉得置身事外仍著遵旨率同新放各路辦事大臣等迅速出關不准逗畱儻敢稍事遷延必重治該大臣等以應得之罪至汪朝榮片內所稱有聯捷奉旨發往前任陝甘總督熙麟差遣委用之語何時有此諭旨著汪朝榮明白回奏○諭總理各國事務衙門奏傳教士在酉陽州被人毆斃並教民房屋均被燒搶請飭查嚴辦一摺據稱接據法國公使照會內稱四川酉陽州民人馮仕銀等將該處城鄉教民房屋燒毀家財擄搶馮文愿等復率多人折散經堂將司鐸店主何魁毆

斃知州懸案不辦並將傳教士瑪弼樂銀錢搶盡毆傷斃命擲屍
河壩捏報因入廟之人與之口角用石塊打斃並稱該知州因馮
仕銀等召至署內飲酒協謀屠滅等語傳教士准在內地傳教載
在條約遇有爭鬪詞訟等案無論中外人等習教與否總須持平
辦理方可使其折服見據照會所稱情形如果屬實自應速爲查
辦以昭公允著崇實駱秉章認真確查速行斷結其被控有案之
馮仕銀張佩超宋文選等並著悉數拘獲秉公審辦毋稍枉縱至
西陽州知州辦理此案貽誤遲延並著崇實駱秉章先行參處○
諭軍機大臣等據總理各國事務衙門奏廣東潮州府城尙未准
英人進城與條約不符請派大員妥籌辦理等語潮州府城准英
人進城通商載在條約久已頒行並奉 文宗顯皇帝諭旨令該
省督撫照條約辦理何以五年之久尙未准該國人入城瑞麟於

接奉此旨後酌帶委員馳往潮州揀擇通達事理之紳士斟酌情形督飭該地方官曉諭開導使知外國和好已久彼此相安此番照約入城係奉旨允行之事斷難阻止毋爲浮言所惑俾該領事得以按約進城用符定約方可以示誠信至華商曾源成虧欠英商銀二萬四千餘圓之多卽使內地民人交易亦當按律嚴追詎得以事屬英商轉存歧視從來地方官辦理中外事件俱存此意以致口實愈多不思其理本短何以使人心服並著瑞麟查明按照條約將曾源成欠項嚴追歸款儻再遷延不交卽著按律治罪以昭平允瑞麟出省後所有中外及地方應辦事宜均著郭嵩燾妥爲經理用副委任總理衙門片一件照會五件均著鈔給閱看將此由六百里各諭令知之○諭總理各國事務衙門奏四川酉陽州人毆斃法國傳教士請飭嚴辦一摺外省教民交涉案件全

在地方官持平辦理迅速了結方可消弭爭端西陽州敎民爭鬪一案該州何以坐視不問任令該民人打搶燒毀致將傳敎士毆斃若因此釀成釁端該將軍等其能當此重咎耶著崇實駱秉章按照該公使照會所稱各節迅速遴委明幹之員逐一確查並將毆斃傳敎士之馮仕銀張佩超宋文選等悉數拏獲歸案訊辦按律定擬不准一名漏網西陽州知州辦理此案任意遲延有心貽誤並著查明先行嚴參懲處總理衙門摺一件照會略節各一件均著鈔給閱看將此由六百里各諭令知之○捻逆復竄山東飭閻敬銘派兵堵剿○予福建陣亡道員徐曉峯建祠○予浙江殉難主事劉鍾祥祭葬世職○是月蠲免浙江蘭谿縣荒廢地畝緩徵甘肅涇州等七州縣被擾被災上年額賦